



Asunto: alegacións á aprobación provisional da RPT do Concello de Outes en relación co posto de técnico/a de normalización lingüística

Anxos Sobriño Pérez, como presidenta da Coordinadora de Traballadores/as de Normalización da Lingua (CTNL), con CIF G-15542897, enderezo postal no apartado de correos 170 de Santiago de Compostela, enderezo electrónico info@ctnl.gal e teléfono de contacto 629 571 950,

EXPOÑO:

De acordo con información que figura no Centro de Documentación Sociolingüística de Galicia (CDSG), desde xaneiro de 2008 ata a actualidade, salvo moi breves períodos de inactividade, o Concello de Outes contou cun **servizo de normalización lingüística** dotado dun posto de **técnico/a de normalización lingüística**. Esta continuidade no tempo mostra que o Concello de Outes tivo e ten interese por contar cun departamento especializado para asesorar a institución na súa política lingüística e para exercer con eficacia as competencias en normalización lingüística que ten como administración local.

O pasado **31 de outubro**, o Concello de Outes anunciou no *Boletín Oficial da Provincia da Coruña* a **aprobación inicial da súa relación de postos de traballo** (RPT). Mais nela non se inclúe o posto de técnico/a de normalización lingüística co que vén contando desde hai aproximadamente once anos.

De acordo co artigo 38 da [Lei 2/2015, do 29 de abril, do emprego público de Galicia](#), a relación de postos de traballo “é un instrumento técnico de carácter público que inclúe todos os postos de traballo de natureza funcional e laboral existentes en cada unha das administracións públicas”. A través deste documento as entidades “estructuran a súa organización, clasifican os postos de traballo existentes no seu ámbito e determinan o



seu contido para a súa selección e provisión, procurando organizar, racionalizar e ordenar o persoal co obxecto de facilitar unha eficaz prestación dos servizos públicos.”

As entidades locais de Galicia teñen entre as súas competencias a normalización lingüística, é dicir, a promoción do uso e o prestixio da lingua galega en todos os ámbitos de influencia da entidade. Así vén establecido na [Lei 3/1983, do 15 de xuño, de normalización lingüística](#), e tamén o [aclararon](#) recentemente a Dirección Xeral de Administración Local e a Secretaría Xeral de Política Lingüística, mediante a redacción e difusión do [Informe sobre a prestación do servizo de normalización lingüística pola Administración local en exercicio de competencia propia](#).

As ferramentas de traballo das administracións públicas para exercer as súas funcións son os **equipos técnicos especializados**, tanto no departamento de urbanismo ou no de servizos sociais como no de lingua. É imprescindible un departamento técnico ou SNL estable, dotado de persoal e orzamento suficiente, para analizar a situación da lingua na entidade local, no municipio ou na comarca, asesorar a entidade en política lingüística e para **planificar, xestionar, executar e avaliar accións e programas de normalización lingüística** que interveñan nas áreas prioritarias onde o galego perde prestixio ou utilidade. En definitiva, os servizos de normalización lingüística son necesarios para que os concellos poidan exercer de forma eficaz as súas competencias en normalización lingüística.

A aprobación da relación de postos de traballo do Concello de Outes é unha **oportunidade para consolidar e dar estabilidade ao servizo de normalización lingüística**, departamento co que xa vén contando a entidade desde hai uns once anos.

Polo tanto, SOLICITO:

- Que o **Concello de Outes inclúa na súa RPT a praza de técnico/a de normalización lingüística**, pois é un posto técnico necesario para que o concello exerza as súas competencias en normalización lingüística con eficacia e de forma permanente.
- Que se inclúan na **relación de funcións do posto de técnico/a de normalización lingüística** as que se enumeran no documento anexo, que ademais son as recollidas nas convocatorias de axudas para servizos de normalización lingüística que convocan anualmente a [Secretaría Xeral de Política Lingüística](#) e a [Deputación Provincial da Coruña](#).

Anexo: “Funcións dos servizos de normalización lingüística municipais”, documento presentado no Encontro de Política Lingüística Municipal, organizado pola CTNL e o Concello de Santiago de Compostela, que tivo lugar en Santiago de Compostela o 16 de novembro de 2015

Pontevedra, 27 de novembro de 2018